

兩
浙
名
賢
錄

兩浙名賢錄卷四目次

理學

元

胡汲仲先生

西山王叔參先生

許白雲先生

程時叔先生

兄端禮附

吳正傳先生

咸朝陽先生

韓明善先生

邵春叟先生

夏自然先生

靜正牟仲裴先生

陳則善先生

明

葉景翰先生

純孝范景先先生

唐思誠先生

退密傅伯厚先生

倪汝新先生

楓山章德懋先生

賀晉閔先生

子士
諸附

陽明王伯安先生

俞本素先生

敬齋鄭孔明先生

梓溪舒國裳先生

黃宗賢先生

周以善先生

應天彝先生

徐曰仁先生

龍溪王汝中先生

周元舉先生

季明德先生

從吾董子濟先生

甌東項遷之先生

李戾璧先生

一山王體仁先生

東山張仲衡先生

徐仲章先生

金汝白先生

東白先生應德夫瑋

陸元靜先生

一庵唐子正先生

張子蓋先生

陳思敬先生

子植
槐附

敬庵許孟中先生

兩浙名賢錄卷四目次終

兩浙名賢錄卷之四

東海徐象梅仲和氏謨

武原許士奇稚正氏閼

理學

元 共十二人

胡汲仲先生

胡長孺字汲仲，永康人。潛心理學，直窺性之微。事至照如懸鏡，儀居不動。而以誠意御之。雖紛糾無不立解。以銓試第一，授迪功郎，歷官福州府。宋亡，退居永康山中。

元初以賢才徵拜集賢修撰與宰相議不合改教授揚州尋轉台州路軍海主簿時浙東大侵明年復無麥民相枕死宜慰同知脫歡察議行振荒之令歛富人錢一百五十萬給之至縣以餘錢二十五萬屬長孺藏去乃行旁州長孺察其有乾沒意悉散於民閱月再至索其錢長孺抱成案進曰錢在是矣脫歡察怒曰汝膽如山耶何所受命而敢若此長孺曰民一日不食富有死者誠不及以聞然官書具在可徵也脫歡察雖怒不敢問長孺雖儒者所至輒以吏幹稱然真心愛民慈祥溢於

法外。每日。一民失所。便非君子學道之實。故所至發摘如神明。而善柔之民。無不樂業者。歷遷兩浙都轉。並運使。司丞。未上。以病辭。不復仕。隱杭之虎林山。以終。長孺初師青田余學古。學古師王夢松。傳龍泉葉味道之學。味道則朱文公熹之弟子也。淵源既正。長孺益行四方。訪求其旨趣。始知涵養用敬爲最切。默證靜觀超然自得。故其爲人。光明宏偉。專務心學。以孟子自許。惟恐斯道之失其傳。誘引不倦。一時學者慕之。有如飢渴之於飲食。方岳大臣與郡二千石。聘至庠序。敷繹經義。環聽。

者數百人長孺爲言人雖最重與同產初無二本皆躍躍與起至有太息者爲辭章有精魄金春玉撞壹發其和平之音海內來求者如購拱壁碑版焜煌燭耀四裔苟非其人雖一金易一字毅然不與鄉闈取士屢司文衡責實賤華文風爲之一變晚寓武林病喘上氣者頗久一旦具酒食與比隣別云將返故鄉門人有識其微意者問曰先生精神不衰何爲遽欲觀化長孺曰精神與死生初無相涉也至夜半喘止其子駒排戶視之則正衣冠坐逝矣年七十五所著書有瓦缶編南昌集寧

海漫抄、樂齋稿、行於世、

許白雲先生 子元附

許謙字益之、金華人、父觥、淳祐進士、無子、以仲兄曰宣之子爲嗣、卽謙也、謙天資高嶷、甫能言、世母陶氏口授孝經論語、人耳輒不忘、五歲就學、凝重如成人、稍長、受業金履祥之門、履祥語之曰、士之爲學、若五味之在和醢、益旣加、則酸鹹頓異、子來見我、已三日矣、而猶夫人也、豈吾之學、無以感發子耶、謙聞之、惕然、由是履祥告之曰、吾儒之學、理一而分殊、理不患其不一、所難者、分

殊耳。讓由是致其辯於分之殊，而要其歸於理之一。又曰：聖人之道中而已矣。讓由是事事求夫中者而用之。履祥歿，益肆克闢，多所自得，自謂吾非有大過人爲學之功，無間斷耳。讓制行甚嚴，而所以應世者，不膠於古，不流於俗，介而不矯，通而不隨，身在草萊而心存當世。素志冲澹，以道自樂，嘗作自省編，晝之所爲，夜必書之。其他若天文、地理、典章、制度、食貨、刑法、字學、音韻、醫經、術數、釋老之說，靡不該貫洞究。又嘗句讀九經、儀禮，及春秋一傳，其宏綱要領，錯簡衍文，悉別以鉛黃朱墨，其

後吳師道購得呂祖謙點校儀禮視讀本不同者十有三條而已。性不喜矜露，所爲詩文非扶翼經義，張維世教者不苟作也。浙東憲府聞謙名，辟以爲掾。辭弗就。肅政廉訪使劉庭直舉茂才異等，副使趙宏偉舉遺逸，亦皆因辭。宏偉在南臺，除舍館，迎致謙，將使衆僚多士有所矜式，謙欣然爲之，起而不久留也。謙從東歸，屏跡人華山中。學者翕然從之，遠而幽冀齊魯，近而襄陽吳越，皆百舍重趼而至。其教以五性人倫爲本，以開明心術變化氣質爲先，以爲己爲立心之要，以分辨義利爲處。

事之制至誠詳悉內外殫甚獨不以科舉之文授人曰此義利所由分也爲學者師垂四十年四方之士以不及門爲耻縉紳先生每就問或訪以典禮政事議觀其會通而爲之折衷莫不厭服臺省監司先後列其行義於朝郡以遺逸應詔終不爲動晚年尤以涵養本原爲事齋居靜定不出里閭者四十年既老尤艱痺僦屋以居田不足以具饘粥處之裕如歲大侵議賴加瘠或問之曰令公私匱竭道殣相望吾能獨飽耶其處心類如此卒年六十八謚文懿所著有四書藁說詩名物鈔

先儒所未備書輯傳蔡說與蔡氏不必盡合春秋有
溫以管窺觀史有治忽幾微行於世子元從葉儀范祖
幹學

高皇帝初定金華訪求白雲之後召之見未至而駕還
金陵驛召赴京與語大悅命爲京學教授官至祭酒

程時叔先生

兄端禮附

程端學字時叔鄞人至治甲子會試第二授仙居丞未
上尋改國子助教陞翰林國史院編修官每論撰爲學
士虞伯生所推服南宋間四明學者多宗陸氏惟黃東

五
發史索齋獨宗朱氏端學與其兄端禮師蒙齋盡得朱
子明體適用之旨二難自爲師友端禮色莊氣和善誘
學者使之日改月化而端學方殺剛正一舉動必合禮
法人以比河南程氏兩夫子云在國學時慨春秋在六
籍中獨未有一定之論乃取前代百三十家折衷異同
著春秋本義三十卷三傳辯疑二十卷或問十卷用經
筵官請命有司取其書板行天下以授來學

吳正傳先生

吳師道字正傳蘭谿人自幼穎異不羣善記覽工詞章

弱冠因閱真西山讀書記幡然有志於爲己之學刮磨
淬礪日長月益嘗以持敬致知之說質於許謙謙復以
理一分殊之旨由是往復詰問造詣益深元至治初登
進士歷官永令皆卓有善政用大臣薦爲國子助教陞
博士其教人一本朱子之訓而遵許衡之成法六館諸
生咸自以爲得師丁內艱歸以奉議大夫禮部郎中致
仕黃潛稱其以道自任晚益邃於文剖析之精援據之
博議論之公視古人可以無媿其所推明者無非紫陽
朱氏之學宋濂稱其緒餘施於郡邑底足以利濟生民

是占其有用之學。所著有易詩禮雜說春秋胡傳附錄
戰國策校註。敬鄉前後錄及文集二十卷。藏於家。

戚朝陽先生

戚仲威。永康人。父象祖。信州道一書院山長。仲威從許
謝問道。潛心性理之說。旁通諸子百氏。同門推爲高弟。
衣糲食淡。克已勵行。爲人所難。不苟時尚。而改其度。嘗
言人知富貴之可欲。而不知貧賤之可樂也。呂氏創義
學。延仲威主其教事。師法嚴謹。學者敬憚之。扁其書室
曰朝陽。人尊之。爲朝陽先生。所著有春秋纂例等書。

西山王叔恭先生

王文煥一名子敬字叔恭少負雅操夙承家學以胡元之亂不屑仕進遂取孔孟諸儒緒言研極精微著道學發明大學發明中庸孟子解及心鏡圖治心銘諸作叔恭以心爲明鏡毋自欺爲藥物畏敬恐懼克復省察爲工夫巍然負泰山北斗之望學者宗之稱爲西山先生

韓明善先生

韓性字明善會稽人魏公琦八世孫高祖膺曹始家於越性天資警敏七歲讀書數行俱下日記萬言九歲通

小戴禮作大義，拈筆立就，文意蒼古，老宿驚異。及長，博綜羣書，尤明性理之學。四方學者輻輳其門。延祐初，以科舉取士，學者多以文法爲請。性語之曰：「今之貢舉，悉本朱熹私議，爲貢舉之文，不知朱氏之學可乎？」四書六經，千載不傳之學，自程氏至朱氏發明，無餘蘊矣。顧力行何如？爾有德者必有言，施之場屋，直其末事，豈有他法哉？其指授不爲甚高論，而義理自融，見人有一善，必爲之延譽及辨析是非，則毅然不可犯。出無輿馬僕御，所過負者息肩，行者避道。田夫野叟，至於童稚，廝役咸

稱之曰韓先生。韓先生云：薦辟皆不就，務自韜晦。綱紳大夫有事於越者，必先造其廬，得所論述，卽以爲繩準。天曆中，門人李齊爲御史，力舉其行義，而性已卒矣。時年七十有六。賜諡莊節先生。所著有禮記說四卷、詩音釋一卷、書辨疑一卷、郡志八卷、文集十二卷。

邵春叟先生

邵大椿，字春叟，壽昌人。景定甲子年甫十二，卽領鄉薦。爲書經魁。旣赴南省，不利歸，益勵志，明於理學。至元戊寅，郡庠延聘講書。歷壽昌、龍游、教諭。婺源晦庵書院山

長元初士子溺於詞章之習太極倡明理學以淑人心
學者始知所趨嚮所著有四書講義若干卷

夏自然先生

夏希賢淳安人究明性理洞詣本原而會其極於象山
慈湖之要杜門不出者三十餘年家雖貧甚泰然自如
有君子風學者稱之曰自然先生子清之大之潛之皆
承家學

靜正率仲裴先生

率字仲裴黃岩人刻志正心誠意之學早喪父以待

母疾不仕教授生徒至數百人爲文章凡以性命爲先
詞華爲後有九書辨疑河圖洛書說春秋建正辯深衣
刑誥定武成錯簡管仲子糾辯致中和議桐葉封弟辯
四書疑義篇門人名其書爲理窟尊之曰靜正先生

陳則善先生

陳宏聲字則善瑞安人性至孝事父母事諸父母若一
動靜端謹年十七獨樓居讀書其上非有故不下衣冠
常儼若就寢始脫一日得龜山南軒二先生語錄玩味
日夕豁然若有所見志於力行自號惺惺藁大抵言體

道觀化之趣。至正戊子七月忽得疾。父母視之。見其衣冠肅整。不知其有疾也。及革。求父扶之。曰。宏辭願死。父手。父問若死將何之。曰。如爐中火。然消則自無耳。遂歌永子感興詩。崑崙大無外一章。溘然而逝。年二十三。
明 共二十四人

葉景翰先生

葉儀字景翰。金華人。受學於白雲許謙。謙語以學者必以五性人倫爲本。以開明心術變化氣質爲先。儀朝夕惕厲。研究奧旨。已而授徒講學。士爭趨焉。其語學。者曰。

聖賢言行盡於六經四書其微辭與義則近世先儒之說備矣由其言以求其心涵詠從容久自得之不可先立已意而妄有是非也

王師下金華召儀爲五經師以老疾辭隱居養親所著書曰南陽雜藁等集吳沉稱其理明識精一介不苟安貧樂道死而不變

純孝范景先先生

范祖幹字景先受業許白雲之門久之遂悉得其旨趣其學以誠意爲主而嚴之以慎獨持守之功引誘學者

惓惓真切。惟恐其不入於善。嘗曰。君子之所不可及者。其惟人之所不見乎。四方士夫。嘗問安否。爲斯文重輕。戊戌。天兵下。葵與葉儀以大學進。尋辟爲咨議。以親老辭。李文忠時守嚴郡。特加敬禮。恒稱師而不字。性孝至篤。郡守王宗顯立純孝坊以表之。學者稱爲純孝先生。所著有羣經指要。讀詩記。大學中庸發微。栢軒集。若干卷。藏於家。

唐思誠先生

唐懷德字思誠。仲友七世孫也。性敏好學。受業許謙。六

經百家之言無不研究其學以濂洛爲宗粹然一出於
正。應訪副使楊篤聘講淮陰聞者傾服。武威余闕持節
海右。或請闕書揚雄九州箴。未知所出。懷德卽援筆寫
之。不遺一字。嘗與宋濂宿錢唐。辯諸子是非。凡九十餘
種。歷誦其文。以針如撞。巨鍾隨叩而應。濂推其博。懷德
曰。徒傳陸澄之書。厨耳。吾則藉之以窮理而施諸事也。
用部使者薦。擢金華縣學教諭。遷衢州學錄。未上卒。所
著有破萬總錄。六經問答鈞玄集。書學指南。存齋稿。總
百有餘卷。

退密傳伯厚先生

傅淳字伯厚鄞人世業儒父時以道學名淳幼有成人志稍長知自奮膏業舉子試不利卽取所業藁焚之益究經史百家言正以濂洛諸儒之說以窮性命道德之奧讀易至繫辭曰聖人以此洗心退藏於密拱手立曰同乎休哉遂顏其室爲退密鄉人以退密先生稱之問學淳正不求人知守令聞其賢每訪以治道必參酌古今以對至老不廢書一夕讀周禮漏下三鼓不置侍者請問淳曰吾樂此不知疲也就寢而逝所著有洪範數

言性理兼說大學補略視志業藏於家

倪汝新先生

倪復字汝新鄞人性端謹嚴毅少力學無間寒暑且勤
劄記讀書不摘章摘句而窮索幽眇務得指歸嘗曰士
生程朱後已幸有坦途矣更欲立門戶與抗邪故其說
經談理止按先儒成法會而通之如辯大學親民參之
金縢新逆及析周程主敬主靜之說非徒言也爲門人
講易及正蒙諸書詞旨洞達聽者莫不悟解尤邃於鍾
律辨析名數鑒鑒中理潛思默會超然獨得故見人輒

舉與義不啻懸河之注也。平生篤於孝友，親喪哭泣，遂成目疾。弟子束脩之饋，不入私室，盡以資弟。檢身以禮，市肆優場，不一履其足。人嚴憚之。或羣居談謔，復至則寂然無聲。師道甚尊，而善引進名士。若通政余本，遂理學有聲，此其一也。所著有易繫辭解、中庸解、正蒙發微、皇極經世書通解、鐘律通考、閒居漫讀記、東巢雜著、壺齋問答、救災集議、帝昀議，見聞欄楯，覩古錄，畏庵存稿，藏於家。

楓山章德懋先生

章懋字德懋自號聞然居士學者因其講學楓木山中
稱曰楓山先生幼穎異隨師所授書無多寡皆成誦比
成童則已博綜羣籍其學根據六經而尤邃於易天順
壬午以易魁薦於鄉成化丙戌會試禮部第一進士釋
褐改翰林庶吉士授編修甫踰月有 旨元宵張燈翰
林賦詩懋具躍率同官黃仲昭莊景上諫忤 旨杖於
廷謫臨武知縣未行有論救者改南京大理評事一考
陞福建按察僉事盜起泰寧托以清軍行部出其不意
遽擒之沙尤饑民嘯聚將爲變急發廩粟賑濟迄以無

事因觸瘴成疾懼貽親憂滿考奏課遂疏乞致仕歸時
年僅四十有一杜門養親四方之士爭來就學執經者
常數十百人士大夫東西行過縣者必造其廬以考德
問業如餘干胡居仁南海林緝熙嘗不遠數千里而至
貧無供具則刈蔬脫粟餉之無不飽者廷臣屢薦力辭
不起弘治十二年召爲祭酒南監時遭父喪力辭詔增
司業員應終制赴官十六年服闋上任明教化訪矩矱
黜無耻開示近裏諸生翕然向風增城湛若水旣得舉
素儒而隱聞懋蒞監特往卒業焉正德元年應詔陳言

治道要務五事再疏乞休不允任滿三載疏引年不符
報歸未幾逆瑾怙權公卿多遭斥辱者人乃服懋先幾
云五年陞南太常卿辭六年陞南禮部侍郎嘉靖初進
南禮部尚書致仕懋懋懷坦蕩不修城府望之龐朴卽
之和厚聽其言開心見誠人與之交則親與之言則信
或以不情處之亦不億逆也居常無甚異同及語道理
談經義窮深入微如寸莛撞鐘迎手而應論天下古今
事若生其時履其地處分其成虧然後知其於書無所
不讀於理無所不會衣服飲食官室器用隨寓而安凡

百嗜好，一不以入其心。筮仕九轉至八座，居官不過十年，歷俸僅滿三考。其難進易退之節，世尤高之。美食事，輒贊之曰：「喜怒不形於色，恩怨不繫於心，矜伐不出諸口，驕泰不措於身，碩膚不自見，小疵不自掩，以闇然自命，可謂稱情矣。」楊文恪贊曰：「儒雅如黃木軒，豪邁如莊定山，公歛華就實，獨立其間，風節如羅一峯，習靜如陳白沙，公既博復約，自成一家。至於收四海無瑕之譽，膺五福無疆之年，此則同時諸老未有或之先者也。嗚呼，在漢東都不爲危言之叔度，在宋鵲湖不立異論之伯

恭公之謂矣。卒年八十八。贈太子少保。謚文懿。子孫皆
大。晚有子。接特恩。與國子生。從子拯。歷官工部尚書。有
才行。恭公遺稿若干卷。藏於家。極自有傳。

賀魯閣先生

子士節附

賀欽字克恭。世家定海。其先戍廣寧。後屯爲遠西人。少
穎敏。沉厚好學。偶得近思錄。朝夕玩讀。得其旨要。遂厭
俗學。成化二年。舉進士。爲戶科給事中。見白沙論學數
日。至性不顯。寶藏猶靈。世卽用我。而我奚以爲用。卽日
上疏辭官去。執弟子禮。事白沙既別。肖其像懸室中。事

之甚謹。秦陵初薦授陝西參議。撫治商洛。以老病母憂
上疏懇辭。且陳四事。一曰。資真儒以講聖學。謂今日急
務莫先於講學。而經筵勸講之官。所謂師友之臣。尤宜
訪求真儒。以克其任。不宜苟以俗儒廁其間。二曰。薦賢
才以輔治道。謂新會縣歷事監生陳獻章。天性高明。學
術純正。誠當世之大賢。爲士夫之矜式。宜以非常之禮
起之。或任內閣。俾參大政。或任經筵。使養。君德。三曰。
遵祖訓以處內官。謂內府監司局庫衙門。載之祖訓。
內官條其職掌。不過洒掃供養。關防出入等事而已。近

年如王振喜寧舒良王誠曹吉祥牛玉汪直尚錦梁方
陳喜輩或陷主虜廷身叛賊境或主易儲君禁錮南內
或謀爲不軌賄易后妃或邀功啓霧流毒邊徼或恃寵
招權納賂不貲或引用左道蠱惑上心或導進淫巧
盜虛府庫此其陷君誤國蠹政殃民昭昭在人耳目者
也宜深鑒已往之弊永絕方來之禍內不可使職掌奏
牘得預大政外不可使鎮守地方掌握兵權則非惟爲
國家無疆之福亦宦官無疆之福也四曰典禮樂以化
天下謂陛下紹基之初罷黜浮屠妄誕之邪術舉行

朱子喪葬之正禮真所謂守成業而致盛治也。但初政之施方發其端而頽敗之俗尚仍其舊禮讓之化未行淫穢之風日甚乞申明正禮之當行革去教坊之俗樂則國不異政家不殊俗而風俗自美民心自善。疏入報聞允辭。四年逆瑾括田東人驚疑思亂義州以守臣貪故遂先發聚衆縱火劫財大擾然相戒曰毋入東街驚賀黃門欽性論曰渠輩既知悔卽不殺人可解鎮城當有人至爾輩直拜跪求生慎毋殺人已而鎮撫人果至潰曳又言軍至且勦衆復呼噪曰賀黃門無謾語又趨

晚欽里門。欽曰：城中擾亂至此，鎮城焉得不發兵？兵雖至，爾等第不殺人，必有爾無恐。衆遂定。城中不傷一人。欽不務博覽，專讀五經四書。小學靜思默識，反身實踐。冠婚喪祭，遵用家禮。每教人讀白鹿洞規。小學鄉人由是興於行義。老更好易，究心象數，手不釋卷。卒，鄉人祠之。凌溪釣臺子士諡鄉貢士，博學篤行，嘗陳十二事論王政，不報，辭疾歸，終身不仕。

陽明王伯安先生

王守仁字伯安，餘姚人。父華。成化十七年進士第一人。

歷官南吏部尚書守仁少有才名弘治五年與胡端敏
孫忠烈同舉鄉試中弘治十二年二甲授刑部主事日
事繁牘夜歸必然燈讀經史過勞苦得疾歸關陽明洞
與山人王文輔許瑋輩靜坐爲養生久之漸悟外求之
非甲子聘考山東鄉試改兵部職方主事正德初逆瑾
亂攻守仁首抗疏論其罪狀瑾怒杖之闕下謫貴州龍
場驛丞始至菱藂棘間夷氓相與伐木爲何陋軒玩易
寓以居日夜端居默坐澄心內觀一夕忽大悟踊躍若
狂以所記憶五經之言一一脗合遂卓然自信以致良

知爲聖門秘旨。體究日精。益洞朗無礙。四年起令廬陵。是年瑾誅。歷遷吏部主事。日與士大夫孜孜問學。有僚友執弟子禮者。尋遷南鴻臚卿。門人日進。南贛賊起。朝廷議用兵。兵部尚書王瓊力薦之。拜詹事府少詹事。往撫南贛。汀漳等處。當是時。宸濠久蓄異謀。結羣盜爲爪牙。四出標掠。聚衆至數十萬。諸撫臣相視莫敢誰何。守仁至。頓日夜練兵。教射名討洞賊。實以備濠。因自請提督軍務。得便宜行事。王瓊素奇守仁。以爲不如是不辦。請上卽與守仁兵符。改提督。由是進攻橫水。左溪。桶岡。洊

頭諸洞夷悉平之。軍威大振。班師至贛。開書院。日進諸生講學。不輟。又設社學。立保甲。弦誦之聲。徧於嶺北。十四年六月。宸濠反。守仁適勘事福建。道經豐城。縣令顧泌告守仁。宸濠反狀。守仁指心額天。誓不與賊俱生。急走小舸。至吉安。與知府伍文定謀起兵討賊。發檄召江西知府邢珣等兵。又密遣謀四出投檄。言京師及湖廣廣東西南京淮安浙江各發兵共數十萬。以疑宸濠。使不敢出南昌。賊果疑。四路兵至。不敢出。遲回半月。日乃出南昌。攻南康九江安慶。而守仁兵則已大集矣。卽傳

徽馬宸濠賊遣人密書與賊心腹李士實劉養正及陳
廿四吳十三若有約內應者宸濠得致書人及書遂疑
士實等士實勸宸濠去安慶直趨南京否徑出蘄黃趨
京師宸濠不聽守仁遂進兵攻南昌擒其居守宜春王
拱條及宸濠子三哥四哥宸濠時攻安慶聞而解圍回
顧巢穴守仁迎戰樵舍縱火急攻大破之擒宸濠及其
子大哥富是時南京大震非守仁在上流疑賊賊不犯
南京必走蘄黃守仁既擒宸濠諸奸佞江彬等導上
南巡下詔親征諸奸佞巧言諛譖百計欲去守仁是時

宸濠未死諸奸佞素通宸濠得金錢者多在。上左右。頗有異謀。長守仁不敢發。守仁深機曲筭。內取凶佞。外防賊黨。撫定瘡痍。激勵將士。日夜如對勅敵。宸濠既得。伏誅。內閣大臣素惡王瓊。因忌守仁。以提督軍務得專。制召兵平賊。歸功瓊。久之。不賞。嘉靖改元。詔錄守仁功。封新建伯。兼南京兵部尚書。參贊機務。遣使迎至京。宴勞。諸忌者。又以賜宴勞費爲辭。嗾言官論沮之。不使至。京。壬午。丁外艱。居越六年。竟不召。四方從避之士輻輳於稽山。所在官糾幾滿。時論益哄。然誠爲僞學。亦不顧。

常語諸生曰。不患言謗。唯患以身謗。岑猛之叛。兩廣聚
兵討猛。猛死。田州而其黨蘓盧王受相結再叛。益發四
省兵。嶺南大困。起守仁以代姚鎮。守仁至。開示恩信。班
師。撤旅。蘓受等自縛來歸。守仁薄示懲遣歸農。刻石勒
銘以示後人。乃諭蘓等。朝廷宥爾。宜有以報皇恩。衆皆
頓首願效死。守仁因八寨反側。久毒嶺表。密與蘓等約
期日去。又先因永樂保靖土兵自嶺南還。密與領兵官
約。過八寨與蘓受等兵相犄角。徑搗其巢。或遇其前。或
截其後。或張左右翼夾擊之。誅斬萬計。而八寨亦平。桂

文襄素忌守仁言守仁挾詐專兵時守仁已病乞致仕
至南安卒桂又言守仁擒宸濠攻城紀律不嚴奏捷誇
張已甚及斥守仁學術不端壞士習乞削奪官爵上
憐守仁功但停卹典子不得嗣封而已隆慶改元廷臣
以請乃追贈新建侯賜祭葬謚文成給券世襲萬曆甲
申採廷議祀孔廟守仁天資超絕少喜任俠長好詞章
仙釋既而以斯道爲已任以聖人爲必可至平生無一
時一念不在於學雖軍旅劬勦中每與諸生相對笑談
指揮不動聲色經歷危變益信良知真足以忘患難出

生死故晚年時時舉以示人曰吾此學從百死千難中
得來豈可易說或言以守仁氣節文章政事勲業足蓋
一世只此却講學一事便是完人守仁答曰某但願從
事講學不願其他古人謂守仁豪傑之才聖賢之學國朝
理學諸臣無出其右所著有陽明集居夷集五經臆說
大學古本旁註及門人所記傳習錄所纂則言行於世
鄭端簡曉曰王公才高學邃兼資文武近世名卿鮮能
及之特以講學故衆口交訾蓋公功名昭揭不可蓋覆
唯學術邪正未易銓測以是指斥則譏說易行媚心稱

快爾今人咸謂公異端陸子靜之流嗟乎子靜豈異端
乎以異端視子靜則游夏純於顏魯而思孟劣於雄況
矣公所論叙古本大學則言傳習錄諸書具在學者虛
心平氣反覆融玩久當見之宰庶人反時又能不顧九
族身任其事不踰旬朔卒平大難宜德樂安之變有如
公者景陵無羈勒之勞矣

俞本素先生

俞繪字本素越人少負意氣爲父兄服里正役輸糧後
海時有聞寇繪統民兵有斬艾功不自敘年方二十有

七。狀貌甚偉。邑大夫見輒奇之。曰。此非凡夫。乃命補校官弟子員。始習文字。邑少俊。以其晚學。頗易之。繪不校。益自奮。不數載。薦於鄉。爲養。就歛訓導。時郡有閭閻經歷者。薛文清公高弟也。名禹錫。由國子監丞。以言事落職。繪日與講明正學。陳督學士賢方以古道勵士。於繪惟相愛重。每稱之曰。若人體用之學。非章句學究。與識時措大而已。特章薦之。沮於時例。弗召。以年資遷崇陽學教諭。身教益嚴。崇陽俗信浮屠。繪著開道錄。具述求福田淨土之無益於得者。開化之。幸士人習文公家禮。邑

俗大變致政家居者四十年未嘗荷出謁闕以讀法乞
言一至郡城老少男婦爭聚觀之莫不額手致敬曰俞
先生俞先生其爲舉子時赴禮部試貸浦令同邑馮公
十金繪官款時馮公下世矣遺金還其子珏珏以無券
弗受繪曰貸金無券馮信我也若遂弗償負馮多矣後
馮復生其謂我何爲文告其墓固與珏乃受官雖司教
聞朝政得失未嘗不憂喜憲廟時羅倫章棘以言被
謫繪在獄抗疏請以已官贖倫等罪天下壯之其孝弟
友愛尤出天性達於家邦至死無瑕累云

敬齋鄭孔明先生

鄭仙字孔明。世家常山之象湖。三歲聞父母哭而知其
五歲誦故事。十三讀書。治舉子業。文理蔚然。二十爲博
士弟子員。及省試。一再不合。弃之。曰。顯親揚名。恐不在
是也。乃走豐城。拜於丁潛軒之門。求踐履實學。乃復見
吳康齋先生。先生於崇仁。康齋曰。此間工夫。非朝夕可得。
恐誤子遠來。對曰。此心放逸已久。求先生收之耳。敢欲速
乎。因受小學。自自驗於身心。徐得聞四子六籍之要。入
之於道。若有見焉。乃歸築室於龍池之上。日取諸儒論

議一切折衷於朱子。凡古載籍靡不讀。但不讀佛老之書。嘗謂其毀肢體滅人倫。卽不容誅。又何待讀其書而後辨其謬哉。一時名儒若蘭谿章楓山。關化吾文山。南目張東白。皆相與可否。所著有易義發明。卦贊。讀史管見。觀物餘論。蛙鳴集。凡十餘萬言。惜以燬燼。其所存者僅十之一云。伉執喪極哀。祠墓殯葬。一本之家禮。設義學。立社倉。事事皆着實地上做。要非所謂瑣屑破碎者。故自號曰敬齋。又曰所迷子。蓋有得於康齋者。學者繼之曰敬齋先生。

梓溪舒國宸先生

舒芬字國宸其先爲東陽人自東陽三遷至梓溪學者稱爲梓溪先生以詩經領正德丁卯鄉薦明年卒業南宮膏夜分不寐於書無所不讀而實勵志於聖賢之學最喜濂溪嘗稱爲中興之聖因著太極釋義通書釋義又作易箋問七十餘條一時深於理學者無不推服焉丁丑中會試第十一名廷對御賜第一甲第一名授官翰林院修撰疏乞終養不許時車駕議以三月十九日警道東巡祀岱宗歷徐楊抵南京下蕪杭復泝江漢登

太欬且瘧中土繁麗先是宸濠入蓄異謀又結陸完鐵
寧輩爲內應而帝星又明於江漢間士大夫非忠義素
定者輒懷疑貳故一聞駕出人情洶洶懼禍不測以爲
天下之事不可爲矣芬乃慷慨首議曰車駕出必不利
此社稷安危之所繫也十五日早疏先入乞留駕言甚
激烈有曰痛哭泣血不忍爲陛下言者江右有親王
之變大臣懷馮道之心以祿位爲故物以朝署爲市廛
以陛下爲奕棋以革除年間事爲故事也復刺關中
謂一切危亡之跡不苦言以抹而聽主之自壞又邀夏

考功良勝萬儀制朝陳太常九門至邸中酌以酒贊之
曰匹夫不可奪志今日之事當先諫無二是夕遂連疏
入時號江西四君子且以告諸同志明日吏部郎張衍
璫等兵部黃鞏陸震等刑部陸偉等疏俱入又明日禮
部姜龍等兵部孫鳳等行人司余廷瓚等疏俱入又有
太醫院醫士徐釐以醫諫車駕遂不果出乃二十日
天威震怒命舒芬等百有七人於午門外跪五日未辰
而入終西而退芬嚴整無異平時二十五日戊午命舒
芬等於午門外褫衣杖三十芬以疏首杖特甚惟口呼

高廟之靈其以感動。上心杖屨幾死卧院中掌院者
懼禍至使人探出之芬吃不爲動曰吾官於此當死於
此又命爲首者謂外任遂謫福建市泊副提舉卽裹瘡
就道或勸俟痊曰死吾分也敢少留邪是將死而復賴
相傳爲野祭既至布德宣威遠夷心服暇則講學不倦
生徒日衆未幾宸濠果反芬時以外艱歸而鄉多宸濠
餘黨抄掠未已。有請避之者芬泣曰父柩在堂避將焉
往堅卧苦塊間不爲動辛巳夏世宗皇帝入繼大統
諸竄謫者皆詔起復官翰林陞俸一級三年乞致仕以

便就養、疏四上、不允、乞改選以便養又不允時 世宗
欲尊 典獻王爲皇帝、爲皇考、命下羣臣議、芬執議謂
爲人後者爲之子、不得顧私親、疏凡三上、固爭不得、乃
率朝紳痛哭於廟 皇帝震怒、杖如前、幾死、奪俸三月、
明年、以內艱歸、生平酷好周禮、詳加訂正、作五官序辨
五卷、六官圖釋一卷、剔僞一卷、旣乃校定正經六卷、總
之十有三卷、題曰周禮定本、未幾、以微疾卒、芬幼卽以
聖賢自期、不屑爲博物洽聞之士、嘗悼異學之謬、曰、是
大亂真而善惑人者也、空言辨之、無如修其本以勝之

因取周子聖學有要數語書之座右顧諟而力行之曰此可以溯洙泗之源矣嘗謂太極圖亦則河圖與伏羲同功而不滿先儒本於易之說又謂漁溪得斯道之正脉而直責程正叔之外師至於周禮一書嘗責漢儒多附會之罪宋儒乏表章之功謂周禮與儀禮戴記猶蜀之於吳魏也賈氏以儀禮爲本周禮爲末謬妄已甚朱子不一正之何也五經嘗疏論數萬言闡其幽趣大抵皆有功於聖門而周禮尤爲有賴非確然見道之真者不能也端居終日讀書治事未嘗晝寢夜必計過自訟

凡親聽言動必準諸禮而不敢少失尺寸居常溫清定省出於誠篤比列侍從卽委身於國曰此太史公教也至於以犯顏諍君爲悅親之實以不媿屋漏爲無忝所生之實凡宗社大計如諫南巡之類綱常大禮如議大禮之類勤勤惓惓必要諸大道而不敢以末世苟且之說雜焉通籍十年義氣激發諫而杖杖而竄又復諫又復杖而絕無一毫得失之心死生利害之念與朋友相劇切無幾微矯飾尤善成就後學與之講論事理惓惓於心術之正嘗語人曰爵祿不入於心溝壑不忘於念

以故門下之士，恪守其教，多爲世名卿者。居疾中，矩度毫髮不踰，臨終沐浴，自告於廟，入室少坐，曰：「此非願也。」卽徐步至廳，自整衣冠，端嚴不動。長子泣問疾，不答。問家事，不答。跪請所欲言，乃瞪目謂曰：「六經太明於世，惟周禮未獲表章。予生平精力用在此書，近年重加校定，幸成全經，知我罪我，我不敢知。第未及造爲款識，爾其無忘乃父之志。」言畢而逝。年僅四十有四，葬於新建象山之原。

黃綰字宗賢，號希人。幼承祖廕，弱冠優通詩義，尤善古詩文。一日因感橫渠論廕襲語，遂弃舉子業，師謝文肅。綰毅然以聖賢自期，揭座右曰：窮師孔孟，達法伊周。隱紫霄山中，歷寒暑十餘年，勤讀苦思，學益克裕。以母命，強出仕，授後軍都事。三疏乞養，歸與王陽明、湛甘泉二先生訂終身盟，講明絕學，共扶世教。一意恬退，家居幾十年。嘉靖改元，詔徵遺逸，以薦起爲南京都察院經歷，適大禮議起，上用何淵議，欲以獻帝入祀太廟，舉朝莫敢沮。綰特疏諫，而寢歷陞光祿寺少卿，纂修明倫大

與時王陽明江右功成忌者議奪縮力疏辨之乃明陞
大理少卿選入翰林改少詹兼侍講學士充講官上
曰爾以不羣之才卓越之見故超資寵用以圖弘功大
典書成陞詹事仍兼侍讀學士晉南京禮部右侍郎兼
督操江事未幾轉左適大同倡亂奉勅往撫計擒首惡
張玉等二百餘名而一方之人遂靖明年乙未知貢舉
南竣事以憂去服闋時有安南之亂起爲禮部尚書兼
翰林院學士充安南正使其區處事宜歷有章疏啓行
聞朝指權相駐私遂構令閒住歸抵家退居翠屏山中

杜門謝客布衣草屨超然於塵墟之表遠近學者爭趨
事之切劘討論終夕不倦所著有四書五經原本明道
編石龍集石龍奏議思古堂筆記家訓等書卒年七十
有五

周以善先生

周積字以善號二峯天性篤誠潛心心理學專務實踐動
準古人蚤師章楓山繼受易於蔡虛齋舉鄉薦師王陽
明其友王龍谿嚴序其文集曰君子之學貴於聞道君
於楓山得其曠於虛齋得其博於先師得立誠之肯綮

所發明可謂信道有聞者也。著讀易管見。啓祚錄。山中
日錄。國說。二峯摘葉諸集。歷南安推官。沅州知州。皆有
惠愛於民。民爲立石頌德。仕至長史。

應天彝先生

應典字天彝。性沉篤。刻志問學。登正德甲戌進士。授職
方司主事。與江山周文典論學有悟。遂引疾歸。與僊居
應良。黃岩黃綰通從。講切又師餘姚王守仁。受致良知
之旨。建書院於壽山。集諸生講學。四方會者常百餘人。
再起兵部車駕司主事。念母病。日無見。復引疾歸養。前

每日針藥忽明人謂孝感朝紳多論薦不赴自稱病至
啓手足名在仕籍三十年前後兩任僅一考而已

徐曰仁先生

徐愛字曰仁餘姚人正德戊辰進士出知祁州遷南京
工部員外歷郎中愛娶於王蓋文成之妹婿也弱冠領
鄉薦遇文成自龍場歸論學稽山愛深拜之遂執贄稱
弟子奮然以聖學爲己任後數年壬申文成自考功遷
南太僕愛亦自祁遷南工部同舟歸越論大學宗旨益
踴躍痛快如醉如醒素數月傳習錄卽是時所編也其

自叙云愛因舊說漸遠始聞先生之教實驟憚不定無
人頭處其後聞之既久漸知反身實踐然後始信先生
之學爲孔門嫡傳舍是皆旁蹊小徑斷港絕河矣如說
格物是誠意工夫明善是誠身工夫窮理是盡性工夫
道問學是尊德性工夫博文是約禮工夫惟精是惟一
工夫諸如此類皆落落難合其後思之既久不覺自舞
足蹈既而與文成同官南都愛性最警敏聞言卽悟又
善發其旨時四方同志雲集文成至不能應每令愛分
接之咸得所欲而去文成有南頓之命愛亦請告歸方

與諸門人謀畊雪上之田以待其歸而竟以疾終矣年
財三十有一也。計聞文成哭之慟。愛嘗遊南嶽。夢一瞿
曇撫其背曰。爾與顏子同德。亦與顏子同壽。文成每語
輒傷之。在祁。值劉六劉七之亂。有保障功。嘗疏陳十事。
多見採納。居南工。廉勤克舉其職。其墓在山陰之大峯
山。而子孫微矣。

龍溪王汝中先生

王畿字汝中山陰人。學者稱龍溪先生。正德嘉靖間。王
文成倡明理學。以致良知爲宗。郡人駭而不信。畿首往。

受業焉。弱冠以高才領鄉薦。士望之爲去就。及是以所
聞出爲諸士言。願從者日衆。嘉靖癸未試禮部。不第。立
焚傳歸。卒業於師門。文成爲治。靜室居之。踰年大悟曰。
致良知三字。誰不聞信得及者。唯我也。丙戌復當會試。
文成命往。不答。文成曰。吾非欲以一第榮子。顧吾之學。
疑信者半。而吾及門士朴厚者未通解。穎慧者乏沉毅。
能闡明之者。無踰子。今宦學者咸集都門。子盍往焉。衆
曰。諾。抵都。歐陽南野。魏水洲。王瑤。湖泊。郡縣人。覲諸同
志。爭迎。幾與相辯證。大爲推服。入場屋。所爲文直寫已

見不數數於時格識者謂此非可以文士伎倆較也拔置高等而同門錢緒山亦在選時閣部大臣多不喜學畿語緒山曰此非吾輩仕時也不就廷試而還時師門來學者衆文成不能徧指授則屬畿與緒山分教之而畿所興起爲多文成論學每提四句爲教法無善無惡心之體有善有惡意之動知善知惡是良知爲善去惡是格物緒山謂此是師門定本不可更易畿謂夫子隨時立教謂之權法未可執定體用顯微只是一機心意知物只是一事若悟心是無善無惡之心意卽是無善

無惡之意。知卽是無善無惡之知。物卽是無善無惡之物。蓋無心之心。則裁奪無意之意。則應圓無知之知。則體寂無物之物。則用神天命之性。神感神應。惡固本無善。亦不得而有也。是謂無善無惡。若有善有惡。則意動於物。非自然之流行著於有矣。自性流行者。動而無動著於有者。動而動也。意是心之所發。若有善有惡之意。則知與物一齊。皆有心。亦不可謂之無矣。緒山曰。若是是壞師門教法。非善學也。畿曰。學須自證自悟。若執權法以爲定本。未免滯於言詮。亦非善學也。以成將

有兩廣之行。緒山曰。吾二人所見不同。盡相與就正焉。
晚坐天泉橋上。因各以所見請質文成曰。正要二子有
此一問。吾教法原有此兩種。四無之說。爲上根人立教。
四有之說。爲中根以下人立教。上根之人。悟得無善無
惡之體。便是無處立根基。意與知物。皆從無生。一了百
當。卽是本體。便是工夫。頓悟之學也。中根以下之人。未
悟本體。未免在有善有惡上立根基。意與知物。皆從有
生。須用爲善去惡工夫。隨處對治。使之微微入悟。從有
歸無。復還本體。及其成功。一也。汝中所見。是接上根人。

教法德洪所見是接中根以下人教法汝中所見我人
欲發恐人信不及徒爲躡等今既說破亦是天機該發
洩時但吾人凡心未了雖已得悟不妨隨時用漸修工
夫不如此不足以超凡聖所謂上乘兼修中下也德洪
資性沉毅汝中資性明朗故其學亦因其所近若互相
取益使吾教法上下皆通始爲善學耳自此海內相傳
天泉相證道脉始歸於一云文成至洪都鄒東郭監本
洲南野率門人三百餘人請益文成曰吾雖出山汝中
與同志里居究竟此事諸君只裏裡性漸相與質之實

有證也。明年文成平思田歸卒於南安。畿方借緒山赴
廷試。聞變渡江復返。迎至嚴灘。與緒山議服制。緒山以
爲父母在麻衣布絰不敢加焉。畿請服斬衰以從。於是
共奔至廣信成喪。扶觀歸越。經紀喪事。廬於墓。定服心
喪三年。建天真書院於省。肖文成像其中。且以館四方
來學者。歲舉春秋仲丁之祭。無間。及門私淑胥以期集
祭畢。分席講堂。各呈所見以取正焉。心喪畢壬辰始赴
廷對。授南職方主事。尋以病乞歸。病已待補。時相夏桂
溪言議選官僚。其婿吳儀制春畿門生也。首以畿薦。桂

溪曰吾亦聞之。但爲文選所阻。一往投刺。乃可。畿謝曰。補官僚而求之。非所願也。貴溪怒曰。人投汝懷。乃敢却耶。若負道學名。視吾爲何如人。遂大恨。畿補南武選。會三殿災。詔求直言。六科疏薦王畿。學有淵源。宜列清班。備顧問。貴溪票旨。詆爲僞學。而罷薦。首都給事戚賢官畿再躡乞休。銓司報予告矣。竟以大察去。畿名雖高。仕竟不達。然終不以是動其心。而孳孳以講學爲務。所至接引無倦色。自兩都吳楚閩粵皆有講舍。江浙尤盛。會常數百人。年八十餘。猶不廢出游。嘗曰。吾百念已灰。而

耿耿於心不容自己者有二師門宗說幸有所聞常年
出。蘇。思。得。一。二。法。畱。相。與。証。明。衍。此。一。脉。天。壤。悠。悠。誰
當。負。荷。六。經。四。書。之。文。厄。於。後。儒。之。臆。測。附。會。道。晦。學
荒。蓋。千。百。年。於。茲。矣。先。師。首。倡。良。知。之。旨。千。聖。學。脉。賴
以。復。續。不。肖。晨。夕。參。侍。謬。承。受。記。時。舉。六。經。疑。義。面。相
指。授。欣。然。有。辨。稽。諸。遺。編。所。可。徵。者。十。纔。一。二。衰。年。日
力。有。限。若。復。秘。而。不。傳。後。將。復。晦。師。門。之。罪。人。也。思。得
偕。同。志。數。輩。相。與。辯。析。折。衷。間。舉。所。聞。編。摩。纂。輯。勒。爲
成。典。彙。之。名。山。以。俟。後。聖。於。無。窮。豈。惟。道。脉。足。徵。亦。將

以國報師門於萬一也。萬曆癸未卒，年八十六。

周元峯先生

周任衡之江山人，與弟積師事章文懿公，講明理學，潛心體究。登弘治乙丑進士，預修孝廟實錄，時進瑾用事，誘以殊擢，不聽，乃補莆田縣令，陞刑部主事。武宗南巡，陸震以直諫下獄，抗疏救之，後出守梧州，地方多事，以勞瘁致疾，卒於官。其平生師友，盡一時名賢，如王陽明、夏敦夫、魏莊渠，講明理學，務求真是，直徵考古聖賢而後已。有元峯文集若干卷，藏於家。

季明德先生

季本字明德，會稽人。少受春秋於其兄本，遂以經名諸生中。弱冠舉於鄉。尋丁父母憂，自是家居者十二年。未嘗一日釋卷，於書無所不讀。每讀一書，必究其顛末，乃已。已而師事新建，獲聞致良知之旨，乃悉悔其舊學，而一意六經，潛心體究。久之，既浸溢懼學者，驚於空虛，則欲身挽其弊，著書數百萬言，大都精考索，務實踐，以究王文成未發之旨。歷仕與處，從游者數百人。時講學者多以自然爲宗，而厭拘檢，因爲龍惕說以反之。大旨以

龍精心以龍之驚惕而主變化。喻心之主宰常惺。其要歸于自然而用功則有所先。間以質諸同志。或然或否。卒自信其說不爲動。始以進士理建寧。務在平反。無成心。及召爲御史。以言事謫。升沅者二十年。止長沙守。其爲政急大節。略小嫌。絕不知有世情。卒以是齟齬歸。歸二十餘年。家徒四壁立。借居禪林。以著書談道爲樂。卒之年七十有九矣。疾且革。猶進門人於榻前。講易。草草如平時。其爲人表裏洞達。無城府。人人樂親之。歿旣十餘年。而鄉人士益思慕不已。相與建祠。禹蹟寺西林。顏

曰景賢又買田若干畝以供祭祀所著有廟制考義
秋私考讀禮疑圖四書私存孔孟圖譜樂律纂要律呂
別書著法別傳說理會編詩說解頤易學四同凡百二
十卷藏祠中

從吾董子濤先生

董濤字子濤號蘿石塩官人以能詩名海內與其鄉之
業詩者十數輩爲詩社旦夕吟詠至廢寢食遺生業時
俗共非之不顧以爲是天下之至樂也此游會稽時年
六十有八矣聞王文成講學山中以杖肩其瓢笠詩卷

訪之人門長揖。縣上坐。文成異其氣宇。且年老矣。禮敬之。又詢知其董蘿石也。與之語。連日夜。蘿石退。謂何生。秦曰。吾見世之儒者。支離瑣屑。修飾邊幅。若木偶人。其下者。貪饕爭奪於富貴利欲之場。而常不屑其所爲。以爲世豈真有所謂聖賢之學乎。直假道於是。以求濟其私耳。故遂篤志於詩。而放浪於山水。今吾聞夫子良知之說。而忽若大寐之得醒。然後知吾向之所爲。日夜弊精勞力者。其與世之營營利祿之徒。特清濁之分。而其間不能以寸也。幸哉。吾非至於夫子之門。則幾於虛此。

生矣。吾將北面夫子而終身焉。得無以既老而有所不可乎？秦起拜賀曰：「先生之年則老矣，先生之志何壯哉！」人以請於文成。文成喟然嘆曰：「有是哉！吾未或見此人也。」雖然，齒長於我矣，師友一也。苟吾言之見信，奚必北面而後爲禮乎？韓石聞之曰：「夫子殆以予誠之未積與？」辭歸兩月，棄其瓢笠，持一鐮而來。謂秦曰：「此吾老妻之所織也。吾之誠積若茲縷矣。夫子其許我乎？」秦人以請。文成曰：「有是哉！吾未或見此翁也。」今之後生晚進，苟知執筆爲文辭，稍記習訓誥，則已倏然自大，不復知有從

師學問之事。今翁以能詩訓後進。從之遊者。遍江湖。道
居然先輩矣。一旦聞予言。而棄去。數十年之成業。如弊
屣。遂求北面。而屈禮焉。非天下之大勇。其孰能與於此。
則如蘿石。固吾之師也。而吾豈足以師蘿石乎。蘿石曰。
甚哉。夫子之拒我也。吾不能以俟請矣。入而強納。拜焉。
文成。國辭不獲。則許之。以師友之間。與之探禹穴。登衡
峯。陟秦望。尋蘭亭之遺跡。徜徉於雲門若耶。鑑湖剡曲。
蘿石日有聞。益克然自得。欣然樂而忘歸也。其鄉黨之
子弟親友。與其平日之爲社者。或笑而非之。或爲詩而

招之返。且曰：翁老矣，何自苦？若是，蘿石笑曰：吾方幸逃於苦海，方知閔若之自苦也。顧以吾爲苦耶？吾方揚鬚於渤海，而振羽於雲霄之上，安能復投網罟而入樊籠乎？去矣！吾將從吾之所好。自號曰從吾道人。子穀仕至漢陽太守，亦精於名理，有四存稿行於世，穀自有傳。

甌東項遷之先生

項喬宇遷之，永嘉人。其學以實行爲主，而輔以理義。其始於傳註文義，專而有聲，已而博極經史，融液理奧，不主一家，當於心。雖下士所言，世之詆毀厭惡者，不敢忽。

不啻於心。雖大儒所言世之嚴奉尊信者不敢從其意。以爲必啻於心而後可以措之行。以成吾身。不然是所言者皆浮辭也。研窮探索。向慕甚遠。恂恂慙慙。動有準繩。自起居食息服器之用。父子兄弟鄉黨親族之間。靡不檢飭。務合於古人之簡朴敦厚而後已。以進士官郎署。出爲撫廬河間三郡。旣擢湖廣按察副使。以註誤例請州郡稍起還舊。復以誣構下詔獄。未幾得復職。旋陞廣東布政司左叅議。素爲同郡張文忠相公所知。試進士數欲推轂不聽。以故不得上第。選庶吉士。避不赴考。

部察以南北散要爲輕重始除主事卽得南京工部比
調北會舉主事改御史總修兩不與名又將自武選調
吏部考功三辭乃免顧益感激數上書言時事其後自
郡至藩省十有八年淹矣故舊滿銓館多移書相勞苦
裁答忠亮不一及已私勢利所在若執熱就深不敢濡
邇至於蒞政臨民慮遠防漸不啻治家無絲髮漏筭起
廢祛蠹雖要途名人不避所至以文學飭治務與士民
相休息而一以實心煦燭之跡其治行卽在漢世循吏
傳中已爲稀濶罕見世之庶靜退抑者衆矣類限於才

諸樸過不暇或巧避職任爾使其力足以振功伐文足以張譽望卽伎倆矜飭競勝嗜進不遑就甘黠闇人後耶以喬之修習卽無宦業一時鮮與相亞而所歷又復磊磊若此可不謂難哉蓋其所學雖不必有所師承而一本於心之精思其所言雖不必有所專主而一據夫身之歷試永嘉自有宋以來專門理學者數十人如林塘與之介二劉之厚陳說書之直周文忠之教林景文之質許橫塘之政事皆足表著使喬生當其時上下議論固不知孰爲低昂明興薛吳之後絕學復倡至白沙

陽明兩夫子出而道一光學者苟無先入皆有窺覷焉
獨崛起孤立不肯輕徇以爲黨援卽其著書滿家亦不
肯輕出視人以立門戶至與同志者論議稍異必往復
辨析弗明弗止自儒生以至顯貴自平居以至行役未
嘗一日去書亦未嘗一日不札記其意以爲措之行則
亦可筆之書以質於人不然其所行者皆愆中也故其
視天下無一不可處之地亦無不可爲之時凡衆之所
難堪與俗之所甚忌者一不以威其心而回其意蓋自
考其學者有在也卒年六十學者稱爲龍東先生

李侯璧先生

李珙字侯璧、永康人。由歲貢授東鄉訓導、陞淑浦教諭。嘉靖乙丑詔拔異材、以風羣吏、當道薦珙、擢大理評事。珙蚤有志理學、徒步見陽明先生於越、先生授以致良知之訣、珙悟、獨居精思、盡得其旨。於是同門錢緒山、王龍溪輩推重之。在東鄉、當道聘主豫章書院教事。及敵浦日、與同志訂會所、至發明師訓、聽從者衆。平居不事生業、死之日、惟曰、只此見在良知、吾今業經受用、性命皆了。古所謂得正而斃者、珙之謂與。所著有質疑稿、若

千卷

一山王體仁先生

王愛字體仁秀水人父朴爲徐聞令有德政年五十始
舉體仁因名之曰愛愛羹墻父訓以聖賢自期已而聞
一庵唐先生講學茗中負笈從之遊得聞討真心之說
已又受業於王龍溪先生盡聞王文成致良知之旨愛
往來吳越間以兩先生言相印可益悟良知不徇情識
卽是真心一落情識卽非真心兩家互相發明初無低
悟自是學益有進癸卯舉於鄉凡五上南宮輒不售愛

不爲動。好言學。如諸生時。公車往來。益編交海內諸名流。相與推明師說。已未。舉進士。場中得其文。驚歎以爲陸子靜之流。請教職。將行。所聞以淑後進。得順天府學。日夕與諸生講究。以身示之。鵠蹈墨履繩。都人士瞿然。顧化時。稱人師。未幾。遷國子監丞。陶鑄六館。如所以教京兆者。擢刑部山西司主事。以遷葬。得請歸。遂不復出。歸凡十年。好學不倦。時與吳越兩先生及諸同志研討。日益精。嘗語學者曰。學以自檢。檢人則隘。學以容人。自容則外。君子以爲名言。堂中懸八戒。以自警。守徐聞故。

棄室不益、棧田不拓、畔蕭然寒素、卽饘粥不給、晏如也。至於急人之難、慷慨赴義、又奮身不辭、上虞同門生徐學詩、以論劾分宜削籍、貧甚、不能爲子娶婦、愛傾橐中百金、以完其婚。他行多類是。性朗豁溫夷、絕無城府。人遇之者、如坐春風中。及卒、神色不亂。顧謂諸子曰：「我生平無善狀、惟於此學稍有窺見、庶幾得全歸、以無負爾祖命名之意。」從容詠黃鶴詩而逝。學者因其自號、稱之曰一山先生。

東山張仲衡先生

張時宜字仲衡先世爲寧波人宣德間名洪者爲鶴慶司理貧不能歸遂占籍劍川之上和村時宜幼穎敏善屬文弱冠廩於學官嘉靖壬辰升入太學時監丞博士閱其文深嘉歎羨惜其不遇一解及部試廷試皆列名上等除四川崇慶州學正尋遷貴州程蕃府學教授時宜以師傅自重以講學明道爲業諸生有志率循者盡革其舊習而不能者亦勉強不敢後在職數年惓惓以古道教士行冠禮以化椎髻倡學田以贍貧士人多從之時宜爲人方正不阿鄉飲司正席與主並太守欲抑

之時宜曰此坐於教職何榮著在令甲不可易也竟不能奪監司諸大夫見其法古初謂其迂既而有成皆翕然敬而愛之丁內艱歸服闋補江西建昌教授郡本文獻士多馴雅蒞職未幾從學者日至時宜益砥礪勉修職業多士觀感爲之丕變數月之內卽駸駸乎有鄉魯風郡人羅汝芳倡明道學與時宜周旋日不足而繼之以夜每同遊丹霞麻姑諸山討論忘歸嘯歌自得望之悠然如神仙中人每登講席同官侍聽雖盛暑不敢揮扇有不覺揮扇者茫然自失扇忽墜地終講竟不敢拾

取其爲僚友敬憚如此一日自思家在萬里年踰六旬
遂致其事而歸諸生留程無問老少皆哭失聲有追送
五六百里者比歸故山舊宅蕩沒乃擇里於鶴之孝廉
村深衣大帶環堵蕭然而一家男女皆習白沙陳先生
之歌洋洋乎聲滿閭里過者起敬滇之有歌自時宜始
道達鄉中老少諭以孝弟忠信俗爲之化有不然者其
父兄必訴於時宜時宜召而諭之其人慙服有誤犯者
悔曰切莫聞於張先生吏民爲盜時宜挺身諭之盜卧
弓於地稽首謝而去卒年七十有六所著有淮園子東

山語錄東山詩草詩教等集行於世學者稱爲東山先生。

徐仲章先生

徐袍字仲章蘭谿人性英敏年十二爲邑諸生初慕左
騷史漢古文辭所排纘逼真名家旣而悔曰雕蟲小技
壯夫不爲顚顚慕尚正學當時學漁洛者矩范有章楓
山先生在不致越步武新建說出羣隊爭攻爲異端袍
獨幽探密証深嗜其旨手傳習錄爲贊稱說以自勉迪
人常恨不得親炙受業門墻稱私淑焉時尊新建者又

高步騭談多遺行而袍內事父母志物咸備事伯兄友
愛二弟卽古三荆二方不啻也日取家禮及諸典章儀
制令其族人習行之又序之譜以別其嫌申之禮以文
其陋族於是有彬彬敬讓之風年未三十應貢更以讓
其次者憐其貧也時華亭徐文貞督學兩浙標其行爲
士林鵠甲午領鄉薦未幾卒袍早歲以文雄意不可一
世及潛心聖學剝落文采一意力行內外純白如夜光
之在璞或爲琬琰或爲瑚璉卽良工對之無得而名恒
與門弟子言曰所謂儒學者不失其自然而已自然者

天天卽理也。理本如是。學亦如是。故君子順天學者。奉爲格訓。以子用光貴。贈承德郎。工部都水司主事。以孫學聚貴。晉贈通奉大夫。福建右布政使。所著有誦餘錄。意求錄。五經旁註。洪範圖。楓山實紀。仁山年譜。各若干卷。行於世。

金汝白先生

金賁亨字汝白。台州人。舉進士第。歷官江西提學副使。天性剛介。力明理學。毅然以聖人爲必可至。動作語默。務與學俱。嘗愛橫渠一時放下。德性有憊。初學當以心

爲嚴師及伊川整齊嚴肅則心便一之語日用工夫莊
敬嚴密言動有紀細過必錄當留曹謁告時屏居數月
取明道延平二先生書反覆潛玩若有會於心一夕夢
伊川二先生在坐責亨詰前拱揖伊川起謂曰家
兄最拙而大悟乃知前日工夫用意過苦責效
太迫反人於鈔之病其於澄然真體似未有悟
入處由是爲學一以明道爲宗坐澄心體認天理久
之端倪呈露靈明畢照隨處順應不加藉口真趣日融
內外合一於明道所謂不須防檢不須窮索延平所謂

洒然氷解凍釋處不覺已侵入之矣故其教人必先之
始已範物由身以達諸言其所建立章程施置規模不
爲彌文末務而推明先賢之道以繼前哲表章先儒之
言以淑後人意惻如也在楊舉行四禮斥大僚之員祀
鄉賢者在貴陽未久而遐邇丕變在閩發明晦庵之學
本之延平豫章龜山明道具有本末竭緒闢道南書院
以崇祀五先生由是閩士始知晦庵之學師承之自在
江右選屬郡志行之士尋之白鹿書院親與講論聖賢
爲學次第所以開發蒙蘊之者極其懇切士人多所翫

風而惜其不久也。實事天性孝友，自堡仕以至辭冠，未嘗一日離父母側。居繼母陳安人艱時，年已五十餘矣，執喪愈謹，三年不入私室，置祭田嚴祀事，遇其日，雖嚴冬甚寒，必沐浴齋戒，薄田數十畝，僅給饘粥，皆先世所遺，未嘗輕受人一介之餽。居鄉，非大禮不入公門，而於民間利病，先哲道縣則孜孜盡心，晚尤好易，因書其所自得爲《學易說》，至論晦庵之學，原其三變，象山之學，明其非禪，尤近世儒者之所未及。所著有《學易記》、《學書記》、《通南錄》、《大學中庸議象山》、《白沙要語》、《白學源流之集》。

東白先生應德夫瑋

應瑋字德夫永康人宋少師孟明九世孫嘗學於楓山先生一見語以黃勉齋所云真實心地刻苦工夫瑋佩服不懈先生稱其純篤後膺貢授徽學訓導補長樂再遷羅源教諭正己率人人皆樂從致仕年九十卒學者稱爲東白先生所著有四書索微尚書要略若干卷

陸元靜先生

陸澄字元靜歸安人始謁文成於留都月一至已益親後請掃廡下之堂而且暮侍焉性故豪邁後日雍默自

持。儼。儼。自。以。爲。不。足。也。其。記。文。成。語。首。云。持。志。如。不。痛。
一。心。在。痛。上。豈。有。工。夫。說。閒。話。管。閒。事。蓋。其。篤。也。已。歟。
屏。絕。文。字。專。於。學。文。成。曰。此。恐。志。不。堅。定。爲。世。習。所。挽。
之。故。而。云。然。使。在。我。果。無。功。利。之。心。雖。錢。穀。兵。甲。散。柴。
運。水。何。往。而。非。實。學。何。事。而。非。天。理。况。子。史。詩。文。之。類。
乎。使。在。我。尚。存。功。利。之。心。雖。日。諺。道。德。仁。義。亦。直。功。利。
之。事。况。子。史。詩。文。之。類。乎。願。一。洗。俗。見。還。養。初。志。當。獨。
然。融。解。矣。其。後。以。多。病。從。事。於。養。生。文。成。曰。養。德。養。身。
只。是。一。事。果。能。戒。謹。不。覩。恐。懼。不。聞。而。專。制。志。於。是。則。

無家所謂神住氣住亦在其中矣。黃帝湯有周花其真
第一體之心官無所不至苟可以長生入觀者亦何惜
以示人如老子彭蠡之徒乃其稟賦實然非可學而至
後世如白玉蟾丘長春皆微學中祖連以爲師者後世
皆不過五六十則所謂長生之說亦必有附指矣。況
但當遺棄聲名清心寡慾一意聖賢不當輕信異道
精神靡歲月爲也。文成於潘景厲意謂曰仁沒吾道益
孤致望元靜者不淺潘執父喪喪失明。潘湖俗於禮文
成爲孝其父墓位至尚書郎。

一 卷廣子正先生

唐鑑字子正。歸安人。自爲諸生時。即有志聖賢之學。及舉於鄉。卒業南雍。遂歸。事南海湛澤民先生。既登制科。官比部。立朝數月。卽以建言削籍歸。閉門講學。信從者衆。時慕王文成先生。不及見也。湛先生稱隨處體認。是聖王先生稱致良知。湛乃兩存而精究之。卒標討真心。三言爲的。時語學者曰。夫真心者。卽真筵之所謂道心也。曰計。學問思辨行之功。卽真筵之所謂精一也。隨處體認天理。其旨誦矣。而學者或昧於反身。專討致良。

知其幾約矣。而學者或失於直任靈明。此討真心之說。不得已而立。誠明得真。心在我不二。不雜。卽所謂體貼天理。與致良知之說。渾然合一。如月落萬川。而萬川之月。以一月攝之。澄湛圓明。照徹天地千古。而有聖人。以真心質之。而無疑千古而下。有聖人焉。以真心候之。而不悖。所謂堯舜之心。至今在者。此也。所謂個個人心有仲尼者。此也。蓋樞合下。識得此心。一念合真。卽是天命之性。但於探討處。得親切之味。則六經皆我註。與故於字內名理。靡不窺。念念合真。卽是率性之道。但於

經緯處克拓得盡則萬物皆我一體放於國家機務
不辭又以討真心工夫不必外求只在當身不必遠
只於日用故於辭受取予出處進退以及衣冠言動
居飲食之節靡不嚴其宗旨領要具在木鐘臺二集
其書可以想見其爲人也學者稱爲一菴先生

張子蓋先生

元仲字子蓋其先蜀之縣竹人宋相忠獻公之後也
越之山陰代有聞父天復以進士官至甘肅行太
監其性生而魁岸總角時嶽嶽負意氣數失口談時

政得失、人物臧否、太僕故抑之、不答也。會楊忠愍以諫
免、忤遷爲詠詞慷慨泣下沾襟。太僕乃色喜、大奇之。嘗
讀書至朱子格致篇、輒乙其處而沉思之。已聞王文成
良知之說、遂潛心理學。嘉靖戊午、舉於鄉、數上公車、不
第。下帷龍山之陽、喟然歎曰、聖賢學自有真、曲士抱
蛙之見、不務卽心證聖、而猥踵其下風、壹何陋也。戊辰
歸自京師、而太僕有滇難、蓋太僕故嘗副滇臬、擊武定
叛夷有功。忌者中以蜚語、卒徙吏訊、忤身掖。太僕萬里
赴逮於滇、已復馳如京、白狀嘗事者、比有詔免太僕官。

籍越後馳如越、陵及門、血纓纓、濟臨天下聞而哀之、庚
午游太學、明年舉南宮射策、賜第一甲第一、人授翰林
修撰、作自以遭逢聖明、釋褐取上第、廩廩期有以自樹、
日索筆守官、下蒐羅金匱、憲典而研究之、隆慶改元、疏
請進講列女傳於兩宮、以修二南之化、不報、戊寅、免太
僕、喪起家奉 旨教習內書堂、忭曰、若曹星近 皇位、
不可去、可使習爲善、勃邪管蕪非人乎、乃取中鑑錄、自
爲條解、又作訓忠諸吟、令歌之、尋管理諸勅、直起居館、
會 皇子生、奉書告楚藩、丁亥起家、用詞林、久次超爲

左春坊左諭德兼翰林院侍讀尋克經筵講官既入侍
金華退而歎曰明主方孳孳嚮學嗚呼受講臣風勸
而講臣不竭忠畢智以迺宸聽非夫也每喁喁然盟
心待對期有所感孚焉神宗皇帝御曆單恩時忤卽
甄白太僕冤狀請以恩及已者移太僕冠服至是復申
前請忤旨格不行忤仰天泣曰吾不可以下見吾父
矣武定之後吾父躬振甲冑斬首虜千級口碑具在乃
今幸事明主而不能爲父洗沉冤長負君親吾死爲
後蓋居常深念兩世登朝父建功不誓志以歿願以身

代父報國而卒。且微國恩報父故。終其身有緦縶之恨。竟以此鬱鬱致疾。疾革。顧弟子呼。陛下者。再。又曰。朝廷亦多有人。乃瞑。忤平生雅志。聖賢之學。宗王文成。然不空事口耳。願務以實踐爲基。嘗曰。知善知惡是良知。爲善去惡是格物。近世學者。徒剽竊文成之外郛耳。又謂朱陸同源。而末流乃岐之。非是。手摛考亭所論著。與文成意符者。彙集之。題曰。朱子摘編。以祛世儒之惑。特操端介。絕不喜姘刻事人。然坦焉。躡中庸之庭。亦不欲以奇行自見。里居數年。私刺不及公門。然事關公義。則

侃侃無少避如議賦法議不毀兩賢祠議祀四先生於
學越人至今誦爲美談天性孝友侍父母疾湯藥非口
所嘗弗進居喪毀瘠祭葬悉遵古禮撫異母弟恩義隆
備居常飯脫粟衣浣補而賑施宗黨若弗及蓋忼之行
誼力追古人其文章春容爾雅粹然一出於正初太僕
作山陰縣志未竟忼續成之又創紹興府志會稽縣志
義嚴褒貶足稱一方信史他所著有雲門志略山游漫
稿槎間漫筆行於世又有不二齋稿志學錄讀尚書考
讀詩考讀史膚評皇明大政記載於家

陳思敬先生

子植槐附

陳善字思敬錢塘人父荆獻博洽端方從王文成游以貢司訓崑山善幼穎異從父游文成門文成以任道器許之稍長卽潛心性命之學弱冠成進士三令岩邑擢宗伯鄉督學滇越梓經史密課程崇行誼士蒸蒸向風所至俎豆之仕至雲南左布政使疏止採金貢象諸大役蠲寸札通政府當大計纔上規勸數十言而已當時褒其抗直未六十引年獲予告歸講明理學郡中推爲主教賦性端樸步中規矩危坐終日無疾言遽色家範

登蕭庭屏悉書古人嘉言懿行可以爲子弟法者冠婚
喪祭悉遵古禮衣粗食糲而性樂施閭里族黨待以舉
火者數十家壬午民亂縱焚官舍十燬其九獨相戒曰
毋入後市街驚陳布政其孚重於時如此纂修杭州府
志子苳槐太學生端介有父風孝友尚義父歿二十年
私居不釋衰經竟以遷葬哀毀卒所著有自微新編幾
於家

敬庵許孟中先生

許孚遠字孟中德清人少負大志既領鄉薦復從唐一

唐先生講聖賢之學。嘉靖四十一年進士。授南真衛主事。調考功。在南都三年。日與諸同志講明正學。學者多從之。未幾。調北考功。而胡選郎汝桂者。自附講學。時時引爭遠欸語。先是。選君嚴重。不輕與後進交。一談。胡獨乃爾。諸僚皆驚。以爲必議流品。各使人竊聽。無所得。清署爲之側目。會冢宰楊襄毅雅不喜講學。又與胡選君不合。而諸講學者亦少橫臺諫。俱爲之羽翼。間巷喧傳。謂將盡易置諸大臣。襄毅心憤之。比大計吏京官黜者。科甲共四十一人。而浙人幾半。乎遠不平。因移病歸。

後三年新鄭高文襄起掌吏部以與華亭有隙痛抑講學者起孚遠考功卽出爲廣東僉事時廣有倭警而大監李茂許俊美復張醜海上助爲聲勢孚遠發十策大約以水陸夾攻爲要務卽身督二軍薄賊壘二魁大懼孚遠卒使人諭降之使縛倭寇以自效又建善後十二策迄安堵以功移閩臬銜者復忌之以閩察謫兩淮運司判官孚遠拂衣歸將遂終隱爲啓筵後學計因往見一庵先生請焉先生曰我二十九建言歸今七十四矣此四十六年中未嘗一日忘記也惟枉已則不可耳今

汝雖暫挫然前途自平坦但踏實地行何害異日追悔
晚矣乎遠遂之官三年擢南太僕丞明年遷南文選郎
中未幾丁內艱服闋補北車駕郎中是時江陵當輜前
衝者乃其門人方佐都察院益用事揚人如掖摧人如
幾天下從風而靡乎遠悠然自如不少屈衝者益恨之
而南昌之命下矣乎遠明於經濟之大體沉細有斷事
至必究極纖微而持之以蕩平正直其守南昌也務庶
民而敦尚教化雖簿書旁午不廢講學二年以特薦遷
陝西提學副使以身範訓士考較肅然三年擢應天府

丞請築當塗隄，饒獲者數千家。會都御史李材以澳事被逮，孚遠與李同年，且以講學相知，因刻揭投諸司申教，爲南道所彈，詔降二級調外歸。會父死，服終起廣東僉事，轉廣西副使，尋擢右通政。晉右僉都御史，巡撫福建。時倭擾朝鮮，挾請封貢，兵部議許之而未定也。孚遠以爲不可，比至鎮，募死士往偵，而躬練兵儲糗以俟。已而偵者來，悉得彼詭謀，并諸島酋相誓殺狀，遂疏聞於朝。謂發兵擊之上策，禦之中策，不可輕許封貢，以啓小夷輕中國心。朝議寔之，卒罷封貢。而倭患得息者用。

孚遠中策也。鎮閩二年，擢南大理卿，尋晉兵部右侍郎。時倭尚未平，以孚遠得要領，遂改北兵左，孚遠在南都，以閒曹日事講學，與楊禮部起元俱以部堂爲領袖，持論不同，傍觀者頗起口語。至是外計復借講學造端謀去之。孚遠遂決意歸。五請始得允。旣歸，不殖生產，亦不如二疏行樂，惟孜孜以講學爲務。於近世學者，獨服膺陽明。然所講非良知派也。講學者多黨，孚遠獨不黨。守建昌時，有講學而負高名者，孚遠雅重之。及以事囑，則請不與交。李都憲布衣交，且同年，向以救之見中。及戊

國中仍以開府禮見衛官。孚遠弗善也。諸葛武侯曰：吾心如秤，孚遠近之矣。生平質直，不藻飾，乏委曲，事至立斷。身所行如所講，常以身驗學。遇人無厚薄，咸吐誠，磊落可喜。蓋自謂學所得如此。

兩浙名賢錄卷之四終